

## 秋興二首 懷謝超輝兄

劉衛林

往歲季秋，摯友謝君一夕病歿。三紀情親，竟一時折翼，故深自傷悼。謝君文武雙全，尤精岐黃並音律，誠奇士也。曩者聽其唱客途秋恨，幾至於淚落。今日涼秋又至，舊曲雖在而故人已去，空有琴劍獨撫。因命筆書拙句，以抒懷抱，並紀故人。

### 其一

庭前一夜聲蕭瑟，感喟無端惜眾芳。  
今日悲秋欠奇士，人間何處說炎涼？

### 其二

無復豪懷似舊時，秋風病骨笑支離。  
飛揚更有誰相顧？泉下故人應不知。

## 有感

劉衛林

絕世風流得幾人？卞和抱玉漫悲辛。  
趙州遠出迎禪客，潘岳甘來拜路塵。  
時勢共憐休迕俗，斯文已墜競趨新。  
如何忍把雙眉畫，辜負金鍼老此身。

